

四庫全書

集部

欽定四庫全書

集部

御訂全金詩增補中州集卷三十一

詳校官中書臣張虎拜

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂金金詩增補中州集卷三十

馮內翰壁

一十五首

壁字叔獻別字天粹承安二年進士歷州縣召
入翰林再為曹郎宣宗朝屢以使指鞫大獄權
貴如歸德知府宿州總帥聲勢焰焰朝廷知其
跋扈而不能摧伏者叔獻以法臨之毛髮不貸
也幼有重名就所長論之館閣臺諫與賓客言

乃其選也徒以小心奉法不畏彊禦故屢以城
旦書屈之識者有用違其長之歎興定末以同
知集慶軍節度使事致仕居崧山龍潭者十餘
年諸生從之遊與四方問遺者不絕賦詩飲酒
放浪山水間人望以為神仙焉山中多蘭每中
春作華山僧野客人持數本詣公以香韻清絕
為勝少劣則有罰謂之鬪蘭所釀松醪東坡所
謂歎幽姿之獨高者惟叔獻能盡之客有以京

國名酒來與之校者味殊不能近正如深山草
衣木食人語覺傭兒販夫塵土氣為不可嚮也
是後松醪鬪蘭遂為山中故事叔獻少日在太
學賦聲籍甚其學長於春秋詩筆清峻似其為
人字畫楚楚有魏晉間風氣雅為閒閒公所激
賞制誥典麗當代少見其比尺牘又其專門之
學風流蘊藉不減前世宋景文左丞董公紹祖
奉使江左得其詩餞行喜見顏間詩四韻每誦

一句輒為一舉觴李右司之純談笑此世為不足玩見叔獻則必為之懔然王延州從之公於鑒裁為海內稱首敬其名德至不敢以同年生

數之北渡還鄉里年七十九終於家

墓碑云所貴於君子

者三曰氣曰量曰品有所克之謂氣有所受之謂量氣與量俱而才行不與存焉本乎才行氣重而絕出乎才行氣重之上之謂品品之所在不崖岸而峻不表暴而著不名位而重不耆艾而尊是故為天地之美器造物者固靳之不輕以予人閱百千萬人之衆厯數十百年之久乃一二見之同乎其時非無孤雋偉傑之士從容於禮文之域角羣乎功名之地唯其俗不可以

為雅劣不可以為勝故自視缺然陳太丘事業
無聞而名重天下房次律坐鎮雅俗而舉世以
王佐許之施之當時未必適用然千載而下有
為之歛衽者非品何以得之元光正大以來天
下大夫士論公

平生者蓋如此

子渭字清甫以門資敘仕為密
院機察清慎而文天下有馮孝子之目今居鎮

陽

同裕之再過會善有懷希顏

寺元魏離宮十日來凡兩前與髯卿偕齋莫少林往其
時已薄暮諸勝不暇訪今同魏諸孫再到風烟上寺僧

導升殿雄深肅瞻仰柱礎門限砧追琢成大壯不見磨
琢痕瑩滑明晃朗摩挲三歎息後世無此匠晚登西南
亭碧玉對千丈如王官天柱如太華仙掌留宿贊公房
秀色夢餘想夜靜耿不眠泉溜琴筑響惜髯今不來聯
詩共清賞

和希顏

虎守天門未易通庾塵無扇障西風主人何負盜憎主
公論不明私害公老伏固非千里驥冥飛似是五噫鴻

紛紛往事渠知幾都付崧巔一笑中

送國醫儀師顏企賢得請歸闕中次朝賢韻

心平窮富恐欺天面有陰功蓋有年歸去青山仁者樂
祕來丹訣老而傳尚醫冗食渠百輩公論共推君十全
技道精微仍遠引就非輕舉亦幾仙

河山形勝圖

書劍丁年記昔遊中條之麓過蒲州地形西控三秦遠
河勢南吞二華秋晉魏兵爭一春夢漢唐壇祀幾荒丘

披圖弔古今人慨不必重登鸛雀樓

雒帥覓蘭作詩以寄

雲插高牙畫戟新春移寶檻燕堂深水南紅藥初退舍
嵩麓紫蘭今嗣音繭足賴肩坐香累高梁華棟豈渠心
使君有問花應語玉樹誠佳非故林

明皇擊梧桐圖

三郎耳譜趁花奴風調才情信有餘天寶錯來非一拍
霓裳中節亦區區

送人出使

陽春有脚蘇疲瘵水鏡無心照潔汙九道澄清天意切
人才一一似君無

習池醉歸圖

襄漢方屯十萬兵習池日往不曾醒紛紛悞晉皆渠輩
何獨王家一寧馨

東坡海南烹茶圖

講筵分賜密雲龍春夢分明覺亦空地惡九鎖黎洞火

天游兩液玉川風

陰晦中忽見華山

吏部能開衡嶽雲坡仙曾借海宮春蓮峯清曉忽自獻

二公何人予何人

草堂春暮橫披

遷客倚樓家萬里五陵飛鞚酒千金草堂澹與春山對
幽鳥一聲春已深

元光間予在上龍潭每春秋二仲月往往與元雷

游歷嵩少諸藍禪師汴公方事參訪每相遇輒揮毫賦詩以道閒適之樂今猶夢寐見之兒子渭近以公故抵任城禪師附寄詩以叙疇昔未幾駐錫東菴因造謁間出示裕之數詩醉筆縱橫亦畧道嵩遊舊事感歎之餘漫賦長句二首

性理諸方已徧叅歸來一錫駐東菴山中蓮社舊招隱旅舍阿戎新對談詩筆如君僧有幾文章媿我老無堪綾書大字拈香疏須趺微之酒半酣

少林脩竹欲天參竹外幽閒草結菴顧我雖存惟白髮
與君曾此共玄談干戈橫絕境猶夢艸樹荒殘人豈堪
臘甕春醪髯莫預商歌悲壯不能酣

雨後看竝玉所控諸峯

竝玉如高人壁立九千仞一日不見之令人生鄙吝春
深木葉敷秀色益濡潤結茅寄僧藍晴碧時得趣老宿
詫孫峯隅侍到齧齏連延青一色枚數數須諦認溟濛空
翠間我亦疑未信朝來雲氣昏埋沒瑜匱瑾如蒼梧正

愁湘妃鬱思舜重陰俄解駁憲霽夕暉襯娟娟忽層出
歷歷分遠近雲峯互吞吐千狀纔一瞬出奇如孫吳相
降如廉藺如衆星拱辰如侯伯入覲接武如朋簪承迎
如介儔負固如吳楚爭長如齊晉怪詭如夷蠻駢羅貢
琛贐窘蹙如擒獲係纍將就斃如應龍神靈蟄卧時奮
迅如天駟超軼垌牧稅羈勒如雄對改容失箸駭疾震
如猛士無譁攢槩俟嚴陣獨兩峯巍然魁傑儼崇峻光
輔嶽柱天鬱為中興鎮降生申與甫周室儔復振詩傳

配松高百世磨不磷

同希顏怪松

崧高地氣靈花木競妍秀玉峯西南趾有松獨怪陋偃
蹇如蟠螭奮迅如攫獸葉勁鬚髯張皮古鱗甲皺菌蠢
藤癭怒支離筇節瘦月上虬影搖風動雨聲驟子落慰
枯禪枝樛礙飛颿盤根萬乘器平蓋千歲壽樵斤幸免
尋厦匠矧肯構龍化會有時天旱期汝救

宋內翰九嘉

一十一首

補一首

九嘉字飛卿夏津人黃裳榜進士乙科歷藍田
高陵扶風三水四縣令皆有能聲入為右警巡
使應奉翰林文字正大中病失音廢居歿於癸
巳之禍嘗有詩云浩歌風露下醉袖拂南山又
題壽安烟霞亭云粧成土壁紅千點界畫銀沙
綠一鈎其才藻可畧見矣

補歸潛志宋翰林九嘉字飛卿夏津人少游太
學有詞賦聲從屏山游讀書為文有奇氣與雷

希顏李天英相埒也至寧初擢高第歷關中四
邑以能稱召補省掾為當軸者所忌求去已而
為延安帥府所辟充經歷召為南京右廵院使
風采甚著以不能事權要罷官俄入翰林為應
奉得風疾引去遭亂北還道病歿年未五十士
大夫惜之飛卿為人剛直豪邁不羣能政能文
甚為時望所屬不幸中以病廢哀哉初召至南
京時屏山亦在余每從之游亂後余居八仙館

與飛卿相邇日相見屬和其詩猶在余橐中文
辭簡古法宋初新唐書惜乎為吏事所奪不多
著性不喜佛雖從屏山游常與辯爭在關中時
因楊煥然赴舉書與屏山薦之曰煥然佳士往
見吾兄慎無以佛老嫚之也屏山持之示交游
以為笑其後西行余以序送之備論其守道不
回今茲云亡豈復見此挺特之士乎

途中書事三首

幼穉扶輪婦挽轅連顛翁媪抱諸孫饑民羸卒如流水
掘盡原頭野薺根

老穉扶攜訪熟鄉驛塵滿路殣相望終朝拾穗不盈把
只有流民如麥芒

攘絲奪麥人爭畧烘日吹風天有年湯餅元非小人腹
繭絲都作大夫賢

館中納涼書事

涼灑塵纓聒耳醒虛堂窈渺好風清雀知愛子來迴哺

鼠不畏人旁午行每用熟眠酬閑寂端知固有享高明
宦遊非不佳官府奔走塵勞漫一生

東州有感

東城衰艸沒黃沙故壘周遭小范衙牧豎那知真老子
龜趺繫馬臥吹笳

搗金明砦作建除體

建牙誓諸將集鳴軍盡驚除道非戰事銜枚幻奇兵滿
鎧霜日輝行陣寂無聲平旦飛出谷桑棗蔽金明定知

此陳迹中原遮寇城執鞭吾不及范公凜如生破碑字
仍在巋巋臥深荆危襟按其壘信哉天下英成敗翻覆
手狐兔今橫行收復會有時夷吾當請纓開圖睨督亢
按劍逐長鯨閉塞亦已久一揮氛曠清

被檄從事

不巾不襪柳陰行朝醉南村暮北莊一旦捉將官裏去

直驅盲馬陣中央

即所乘盲馬而言

留別孫俊民姚公茂

艸根殘日射離觴主席風生熱肺腸此去堯零紅照夜
輸君吹笛傍糟牀

酴醾菊

酴醾風味醺人醉著莫東籬愛酒翁一夜金英全換骨
冷香晴雪滿秋風

蓮社圖

野鷺家雞俗好非虎溪泉石滿塵埃壯哉砥柱頽波裏
惟有淵明挽不來

飛卿不喜佛法自言平生有三恨一恨佛老之說不出於孔氏前二恨辭

學之士多好譚經潤文三恨大才而
攻異端潤明挽不來之句益自況也

卯酒

臘蟻初浮社甕
籥宿醒正渴
卯時投醉鄉
兀兀陶陶裏
底事形骸底事愁

題李白泛月圖

江心月影盡一掬
船頭月影盡一吸
夜涼風露點宮袍
天地之間一李白

李右司獻能

二十首

獻能字欽叔河中人年二十一以省元賜第廷
試第一人宏詞優等授應奉翰林文字在翰苑
凡十年出為鄜州觀察判官用薦者復應奉俄
遷脩撰以鎮南軍節度副使充河中經歷正大
八年河中陷獨得一船走陝州被召以道梗不
能赴就權陝府行省左右司郎中軍變遇禍欽
叔資稟明敏博聞強記輩流中少見其比為人
誠實樂易洞見肺腑世間狡獪變詐纖悉無不

知然羞之為不道也與人交不立崖岸杯酒相
然諾赴難解紛不自顧惜雖小書生以愛兄之
道來亦殷勤接納傾筐倒庋無復餘地時輩以
此歸之家故饒財盡於貞祐之亂京師冷官食
貧口衆無以自資太夫人素豪侈厚於自奉小
不如意則有金魚墮地之譴人視之殆不堪其
憂而欽叔處之自若也欽叔文章行業過人處
甚多而天下獨以其純孝為不可及云

補歸潛志李獻能欽叔河中人先世以武功顯
仕至金吾衛上將軍時號李金吾家欽叔昆弟
皆以文學有名從兄欽止獻卿先擢第繼以欽
叔又繼以從兄欽若獻誠從弟欽用獻甫故李
氏有四桂堂欽叔苦學博覽無不通尤長於四
六南渡擢南省魁後中宏詞遂入翰林為應奉
考滿再留出為鄜州觀察判官再入遷脩撰正
大末授河中帥府經歷官北兵來攻軍敗奔陝

又為陝府經歷官天興改元陝亂見殺年四十
三欽叔為人眇小而黑色頗有髯善談論每敷
說今古聲鏗亮可聽作詩有志於風雅又刻意
樂章在翰院應機敏捷號得體趙閒閒李屏山
嘗曰李欽叔天生今世翰院材故諸公薦之不
令出館嘗謂人云吾幼夢官至五品壽不至五
十後竟如其言異哉

贈王飛伯雜言一首

東風吹客衣，敗絮逐風飛。
曉雪沒寒薺，無物充朝饑。
空簞嘖嘖號，饑鼠饕蝨蠕蠕緣。
破袴人生豈是犬，與雞終歲區區守門戶。
游說萬乘苦不早，儀秦殆是穿窬盜。
六國印千金，車滿眼榮華。
鏡中老孔子，聘列國孟軻游齊梁。
能令千載後名與日月光，男兒生世不虛生。
死恨身後無聲名，不然鳴玉遊紫京。
不然著書談六經，九日可射天。
可補鞭笞百蠻作降虜，離騷一篇亦不惡。
雄筆盤盤映千古，君不見彩鳳翔丹霄。
一鳴應九韶，寸雲起泰

山霖雨滿人間丈夫窮達果在天安用兒女得志相歎
羨失志相悲憐仰天大笑出門去四海今誰魯仲連

夜宿虛皇閣下

倚天青壁截雲霞一水高懸界削瓜不惜玲竚攀石磴
要看絢爛圻雲華玉峯影裏虛皇閣鐵笛聲中祕監家
明日川塗入塵土却應平地幾褰斜

玉華谷同希顏裕之分韻得秋字

玉龍落峽噴飛流空翠霏霏晚不收軟脚山堂一壺酒

暮涼閒對兩峯秋

四皓圖

弋繒安足致冥鴻自是兼懷翊贊功
漫說壺關有遺老望思臺上已秋風

二老雪行圖二首

自笑膠膠擾擾身十年匹馬走紅塵
何時雪滿平生履太華峯前約故人

抱琴衝雪又衝風二老風流阿堵中
未似村翁眊抹眼

火爐頭上話年豐

別馮駕之

東風弄微寒吹雪作輕陰春歸未得歸愁攪客子心與
君俱異縣那復重分襟感時復恨別老懷苦難任憶昨
滎陽會燈火語夜深縱談間俳語浩歌雜狂吟相期梁
宋游感君肯相尋西園偶差池市樓成孤斟相逢渭水
湄暫爾成盍簪燕鴻還別去又復如商參我行落日邊
匹馬獨登臨君方無定在倦翼思茂林人堪幾回別老

境各駸駸消水不西流雙魚定沈沈幸有西飛鴻無吝
金玉音

昆陽元夜南寺小集

春臯短短生蘭芽東風嫋嫋吹芳華暗黃著柳小梅素
月姊新年恰十五東皇太一來翩翩竹宮神光祀甘泉
茂陵弓劍沒秋草鳳燈煌煌空自然當年曼衍魚龍舞
回頭昭陽化飛土昆陽客舍冷於冰破殿蕭條佛燈古
雪消梁苑想春紅車如流水馬游龍銀鉶載酒隨春風

酒酣一醕百杯空韶華過眼弦上箭人生得酒從歡醺
北斗闌干夜參半耿耿疎星淡河漢

追憶潁亭汎舟寄陽翟諸友

十月冬氣寒清霜殞羣木輕舟汎潁水微風吹野服信
流不知還石艇橫老玉苔花錦爛斑懸溜珠陸續頗離
塵市雜倒瀉軒裳俗歲月今幾何春草萋以綠懷歸劇
飢渴仰羨雙飛鵲矯首九山雲迢迢傷遠目

郊城秋夜懷李仁卿

日入群動息暝色陰濛濛故人隔潁水娟娟生秋風輕
風捲纖雲碧漢磨青銅坐久襟袖涼皎月升天東伊人
如此月霽色羅心胸可望不可親倏已駕飛鴻念此太
虛間心交神自通而況千里月相望寧不同孤光透薄
帷儼如接音容翻翻繞枝鵲唧唧侵堦蛩上牀轉不寐
高樓待晨鐘相思夜何永月落秋牀空

題飛伯詩囊飛伯以布為囊采當世名卿詩投其

中

穎露毛錐祇自賢
智如樗腹但求全
迂疎差似淵才富
羞澀猶無杜老錢
收拾珠璣三萬斛
貯儲風月一千篇
嘔心大勝奚奴錦
要與風人被管絃

送王飛伯歸陽翟

故舊相望似曉星
平生懷抱向君傾
朱絲不入秦箏耳
彩鳳終儀韶漢聲
三楚迢迢動離思
九山落落助高情
一廬擬就隆中臥
要子同躬隴上耕

西園春日

的皤冰梢出短牆泓澄暖綠靜橫塘娟娟高竹迎人翠
嫋嫋長紅隔水香病起心情疎酒酸朝來風色妬年芳
只應歸去雲窓晚夢到湘妃錦瑟傍

榮陽古城登覽寄裕之

突兀高臺上古城登臨人境兩崢嶸關河落日歲云暮
草木臨風氣未平虎擲龍拏王伯事天荒地老古今情
一盃欲洗興亡恨為喚窮途阮步兵

從獵口號四首

蓮燭金紗簇簇齊宮槐籠曉尚淒迷景陽鐘罷聽殘漏
萬馬銜霜不敢嘶

閭闔傳符啓九關一聲清蹕駐南山虎賁先導三千士
天馬初離十二閑

爛爛龍旂捧日輝從臣遙認赭黃衣天王清曉親弧矢
初合今冬第一圍

的皪金鉤墮曉星晴天霹靂應弦聲風毛雨血燕雲在
未要草間狐兔驚

上清宮梅同座主閒閒公賦

厭住盧家白玉堂
琳宮瀟灑占年芳
光生琪樹風霜古
影占銀潢月露涼
物外根株本仙種
世間紅紫避嚴粧
黿頭詞伯今何遜
一笑詩成字字香

丹陽觀竹宮中移賜

素士如林侍紫清
紫清新許住蓬瀛
娟娟粉節霜勻出
矗矗烟梢玉削成
福地根莖蒙化育
中天雨露藉恩榮
綠章封事朝來奏
又聽風前彩鳳鳴

御訂金詩增補中州集卷三十

欽定四庫全書

御訂全金詩增補中州集卷三十一

王右司渥

一十一首

補一首

渥字仲澤以字行興定二年進士調管州司候
不赴壽州防禦使邦獻商州防禦使國器武勝
節度庭玉愛其才連辟三府經歷官在軍中凡
十年舉寧陵令未赴丁太夫人憂廬墓三年服
除復授寧陵正大七年朝廷興宋人議和擇可

為行人者仲澤以才選凡再至揚州制司宋人
愛其才有中州豪士之目使還以寧陵課最遷
一官入為尚書省掾三月即授太學助教克樞
密院經歷官八年院廢權右司郎中中年失利
不知所終仲澤博通經史有文采善談論工書
法妙於琴事詩其專門之學人物楚楚若素宦
於朝吏事則與冀京父相上下其辨博又屏山
所許天下談士三人之一也嘗與予行內鄉山

中馬上賦詩云霜風十月餘千山錦崢嶸又九
日在潁上見寄云茫茫襄城野歲晏多風埃野
田半已荒草蟲鳴更哀西風吹白雲大隗安在
哉七聖之所迷而我胡為來我本林野人初無
經世材失身鞍馬間坐令雙鬢催安得元紫芝
共舉重陽杯詩成西北望九山鬱崔嵬此詩脫
遺處不復能記憶讀之尚可以見斯人胸懷之

髣髴

仲澤潁上詩不才被棄翻為福拙計無營
却似高是處青山可埋骨誰家白酒不消

憂夕陽轉屋挂林影急雨
壞橋喧水聲人喜傳之

補歸潛志王渥仲澤後名仲澤太原人家世貴
顯少游太學有詞賦聲屢中高選南渡後擢第
為時帥鄂屯邦獻完顏錫里所知故多在兵間
後辟令寧陵有治迹召為省掾因使宋至揚州
應對華敏宋人重之回為太學助教充樞密院
經歷官俄遷右司都事稍見信用天興改元從
持嘉喀齊喀提兵出援武仙鄭州西遇北兵大戰

歿於陣性明俊不羈博學無所不通長於談論
使人聽之忘倦工尺牘字畫道美有晉人風作
詩多有佳句其贈李道人云簿領沈迷嫌我俗
雲山放浪覺君賢又潁州西湖云破除北客三
年恨慚愧西湖二月春又過龍門云詩成一大
笑浩浩洪波東

潁亭

三載西湖阻勝遊潁亭聊喜散羈愁九山西絡烟霞去

一水南吞澗壑流
賓主唱酬空翠琰
干戈橫絕自滄洲
忽忽匹馬從軍去
慚愧烟波萬里鷗

有寄

十年鐵馬暗京華
客子飄零處處家
征鴈久疎河朔信
小梅重見汝南花
樓榭活計依簷雀
冉冉年光赴壑蛇
舊雨故人應念我
不來聯句夜煎茶

寄京父

憶昔相從在寢丘
城南城北縱歡遊
杏花聯句香隨馬

野水添杯浪拍舟邂逅又成三月別飄零合負一春愁
汝陽淮甸經行徧應有新詩為我留

餐秀軒

秋風幾日搖霜樾秋色南山兩奇絕野人窓戶終日開
要看千秋秦嶺雪層崖深谷相吐吞落日白鹿東南奔
野花雙堦古蘭若樓觀縹緲煙霞昏玉山生玉人不識
草木四時空好色輞川舊與藍橋通細水至今流石室
一川黃葉長安秋望望不見令人愁書生不是濟時具

收得閒身成此遊主人開筵留客醉山雨多情濕征袂
明朝騎馬上七盤回首山家但空翠

遊藍田

甲申之秋月建成我行商嶺正落木山英似與行子期
撥霧披雲到山腹古潭千丈照錦峰下有螭龍上棲鵠
高風吹雪已多時熊耳雙尖寒欲縮新乘一水出龍渦
驚見千峯遮榭榭南山秀拔北山雄劍戟森然對羣玉
崎嶇直過藍田西始見商山真面目悟真峽口忽中斷

天末脩眉畫濃綠此峽何年得此名曾有金仙構華屋
西巖石室懸細水萬斛瓊珠輸輞谷行人尚說有七盤
瘦馬已愁疲百曲風門放眼望秦川擾擾更嗟塵界跼
去年游騎渡葭蘆萬里橫行如鬼速灞陵原下馬飲血
太華峰頭虎擇肉今年九月未防秋始見登場有新穀
一鞭暮指古招提疎雨有情留客宿主人聞客喜相接
罇酒笑談如昔夙塞予懶散本真性臨水登山此生足
一行作吏志益違十載從軍雙鬢禿官家後日鑄五兵

便擬買牛耕白鹿

送裕之還嵩山

高懷不受簿書侵，清潁鷗盟欲重尋。
老去宦情如我薄，閒來道念見君深。
對牀夜雨他年夢，滿馬西風此日心。
嵩頂勝遊誰得共，如聞仙馭待知音。

末句用古
仙人詩語

古仙人辭今附于此

夢入雲山宮闕幽，驚鷺同侶駕鳳流。
桂月竟夜光不收，世俗擾擾成器湫。
醉飛星馭鞭金虬，八仙浪迹追

真游龜玉筌蹄二十秋摩霄注壑須人求覓劍如或
笑刻舟陽燧非無角綺儔元鼎以來虛崑丘東井徒
勞冠帶脩松食竹飲度蜃樓崧頂坐嘯垂直鉤祗應

慚愧劉幽州

知音者無
惜留跡

興定庚辰夏六月望予與元好問趙郡李獻能
同遊玉華谷又將歷崧前諸剎因憩於少姨廟
元周行廊廡得古仙人詞於壁間然其首章直
屋漏雨為所漫剝殆不可辨乃磴木石而上拂

拭汎滌迫視者久之始可完讀觀其體則柏梁
事則終始二漢字畫在鍾王之間東井又元鼎
所都幽州必賢宗子虞也夫眷眷不忘幽州者
非吾田疇尚誰歟田復所事之讐却曹瞞之賞
衰俗波蕩中挺挺有烈丈夫風氣其死而不忘
蓋無疑其能道此語亦無疑觀者不應以文體
古今之變而疑仙語也噫仙山靈嶽宜有闕衍
博大之真人往來乎其間而世人莫之識也予

三人者乃今見之夫豈偶然哉再拜留跡以附
知音者末渾源雷淵題此詩為仙語無疑然直
謂田疇則似亦未安屏山李純甫題

遊丹霞下院同裕之鼎玉分得留字

霜落豐山白水收歲華全在竹園頭賦詩鞍馬慚真賞
載酒林泉阻勝遊野色自隨人意遠夕陽應為鳥聲留

仙源回首旌旗隔一笛西風喚客愁

丹霞下寺土人以竹園頭名之

驛口橋看白蓮

陰陰喬木障晴暉的的冰渠照碧漪秋暑困人仍御扇
晚風生竹却添衣百年蓬鬢關心切千里蓴羹與願違
杖屨頻來約他日不妨先築釣魚磯

蒙城縣齋

穀雨連朝沒麥場官糧未入長官忙堦庭有雨青蛙鬧
牢戶無人白日長

三門津

層崖摩蒼穹四月號陰風大河三門險神禹萬世功他

山亦崔嵬砥柱獨尊雄雷霆日關擊悍暴愁天公劉侯
智有餘始令舟楫通仍餘石上穴飛棧曾連空遙瞻白
玉枝挺直丹竈中仙公去不返此事真冥蒙沿崖訪古
迹怪幻尤難窮獨喜兵火餘歸然出新宮當時疏鑿意
四海要會同誰知千歲後築壘防嘯虎詩成一大笑浩
浩洪波東

被檄再至揚州制司驛亭有題詩譏予和事不成
者云來往二年無一事青山也解笑行人因為解

嘲

二年奔走道途間
知被青山笑往還
只向江南南岸老
行人應更笑青山

開福寺

翠林深處款招提
冉冉春風入鼓鞳
雲獻好山青入座
雨添新漲綠平堤
樹頭樹底見花發
山後山前聞鳥啼
踏月歸來聞好語
兒童爭唱白銅鞮

冀都事禹錫

二首

補一首

禹錫字京父龍山人崇慶二年進士調洮丘簿
與縣令者不相能及令以贓敗疑京父發之乃
賂遺權貴誣京父以賓客依託之事坐廢十年
朝臣薦其才者積十數人終為銓曹所礙居襄
邑部使者起之攝旁近諸縣所至有父母之愛
農司治許昌又為主事區處餽餉上下千餘里
不露聲迹而條畫次第皆具雖凌雜米鹽若不
足經意者問之即應如指諸掌一時吏如康伯

祿李欽止諸人多自以為不及也正大中當路諸公極力辨其被誣乃得以常調守扶風丞召補省掾不就歸德奏克知事及城被攻京父為經歷官守禦之策一府倚重之車駕至授左右司都事兼應奉翰林文字古納之變家人勸京父羸服免禍不從人有自外至者京父問賊入禁中否曰禁中賊滿矣乃自投水中在京師時希顏仲澤欽叔京父相得甚歡升堂拜親有昆

弟之義而不肖徒以文字之故得廁諸公間希
長子六歲澤長四歲欽與京少子二歲希沒於
正大辛卯之八月年四十八澤沒於明年之七
月年四十七欽沒於其年十一月年四十一歲
京沒於又明年之三月年四十二蓋不二三年
而五人者惟不肖在耳今日錄諸君子詩感念
平昔不覺流涕之被面也

補歸潛志冀禹錫京父惠州龍山人幼聰敏絕

倫年十九擢大興魁入太學有聲弱冠登高第
時雷希顏宋飛卿皆同榜號為得人京父入仕
以能稱遇事風生老吏莫及初主洮丘簿以年
少喜交遊飲酒遂為其令所乘坐廢再調考柘
二城皆主簿又以治聞由前過終不得京官朝
士屢薦之為當途者所沮居閒日與諸公宴遊
蒙昭雪得扶風丞因客睢陽為行樞密院辟為
都事末帝東遷擢為應奉翰林文字充尚書省

都事富察古納之變與宰相李蹕同見殺年四
十三京父少年作詩鍛鍊甚工寫畫亦勁健可
喜其贈先子詩有云忠策萬言憂國獻好詩千
首課兒抄又哭先子云大才自古無高位吾道
何人主後盟又醉鄉廣大寬留地仕路崎嶇小
作程散文亦精緻嘗作余先子哀詞雷丈希顏
善之

僧房

上方樓觀袂衣寒霜後川原眼界寬我是禪房未歸客
阿師休作長官看

贈雷御史兼及松菴馮丈

平生疾惡如風手力振臺綱事所難人道千鈞羞射鼠
我憐衆煦解漂山明時士論知無負晚歲交盟豈易寒
見說嵩前茹芝老白雲倚杖待君還

聞誅高琪詔下寄聶元吉

開函喜讀故人書四海窮愁一豁無見說帝廷能殛鯨

逆知天意欲亡吳兩宮日月開明詔萬國衣冠入坦途
莫向新亭更垂淚中興豈止一夷吾

蘭泉張建

二十三首

建字吉甫蒲城人明昌初舉才行授絳州教官
召為宮教應奉翰林文字以老乞身道陵愛其
淳素不欲令去左右眷眷久之超同知華州防
禦使事仍賜詩有從今畫錦蓮峰下三樂休誇
榮啓期之句士林榮之吉甫自號蘭泉老人有

集行於世其論詩云作詩不論長篇短韻須要
詞理具足不欠不餘如荷上灑水散為露珠大
者如豆小者如粟細者如塵一一看之無不圓
成始為盡善吉甫詩雖不能盡如所言然亦未
為無所得也

擬古十首

飛雲何冉冉高興日月齊中有兩仙人盛服持玉圭我
欲從之游天險不可躋邈焉望不及短日西山西

客從嶽頂來貽我松粉黃為言服之久身輕欲飛翔我
嘗淡無味我嗅寂無香還君三太息世好方膏梁

枯桑依頽垣摧折生理微剝我枝間葉備君身上衣葉
盡誰復顧棲鳥亦來稀君看牡丹叢日日笙歌圍

青青河濱柳柯葉柔且妍一從智巧萌戕賊為栝樅器
成豈不佳天質失自然爭如河堤上濯濯披春烟

石泉何清冷中有九節蒲蒲性本孤潔不受滓穢汙一
移入城市生意寄泥淤翠葉日焦卷不霜而自枯寄言

守靜者勿涉奔競途

庭前蘭蕙窠三年種不成門外旱蒺藜一旦還自生第
恐傷我足鋤去根與萌如何一雨後走蔓復縱橫

有客曳長裾袖刺謁高閤低頭拜閭者始得通姓名主
人果厚眷開宴海陸并顧必承彼顏語必順彼情不如
茅簷下飽我藜藿羹

葦葦嶧山桐一樹十二枝枝分十二律所指各不移胡
為師襄子獨謂東南竒一律不可闕一枝不可遺誰能

以此意說似典樂夢

美人何熒熒顏若茗之英絕世而獨立一顧傾人城三
星正當戶俟我亦在庭之子無良媒不敢犯露行
丘中有一士顏貌清且癯緼袍僅蔽體蔬飯不滿盂時
出蓬華門鼓腹歌黃虞不知何所得矯首望八區

山中

林櫻墮紅珠打著琴上絃山人時一笑愛此聲琅然

韓信廟

一檄風馳萬壘降當時意趣已難量既能歸漢識真主
何必下齊求假王將幄深嚴巖巖樹碧門旌搖曳嶺雲黃
我詩責備春秋法勝把君侯美處揚

送張子玉

渭水玻璃碧秦山劍戟明秋光如我瘦行色與君清蟬
嘒西風柳鴉翻落日城歸舟幸無物且莫苦貪程

梨花

蠹樹枝高茁朵稠嫩苞開破雪搓毬碎粘粉紫鬚齊吐

潤卷丹黃葉半抽月影曉窓留好夢雨聲深院鎖清愁
瓊胞已實香猶在散入長安賣酒樓

長安酒家
有梨花樓

答華陰宋先覺

雲臺清境憶當年詩筆逢君厭老拳後會邀如千里遠
壯懷不似十年前風帘搖曳橋南酒烟樹溟濛渭北天
咫尺靈山飛不到夢魂長遶玉峰蓮

送賀彥淳還南郊

玉峰明滅暮雲邊默計歸程約半千襁負尚憐靈照幼

家貧賴有孟光賢臨岐淚眼三年別夾路風槐六月天
佇立望君西去遠夕陽村落起孤烟

山村風雨圖

雨昏山店望未見風緊傘簷張不開莫訝披圖便成句

為曾行到此中來

吉甫又嘗有詩云風卷旱塵攙馬過雲移涼影趣人行其寫目前之景甚

與山村風雨詩相似今附于此

賦胡直之溪橋蓮塘二首

倣漁父詞體

溪橋脚下水平分橋柱萍粘浪打痕天向晚日攬昏兩

簇青烟斷岸村

拂拂輕風漾翠瀾珠璣新撲小荷盤塘水漲岸痕漫草
閣臨流五月寒

雜詩二首

瓦餅擔山泉石鼎煮巖菊燎以松桂枝清芬滿茅屋
踏雪尋梅花雪梅同一色不是暗香來梅花尋不得

俊師定菴

渟泓石上泉照我良是我輕風一蕩激真態互掀簸乃

知求慧性非戒定未可道人此名菴千劫付一坐海月
自澄明天花任飛安吾生劇萍梗萬里信漂墮湛然摩
尼珠坐受昏塵裏何時陪遠公同社事香火

送王主簿還鄉

笑君習氣只書生薄有歸裝亦自清瘦僕擔詩雙籠重
羸牛引輓一車輕長亭已過那知遠別酒猶多未忍傾
記取明年斷腸處玉梨花底月三更

張瓚

一首

瓚字器之河中人才氣超邁時輩少見其比年
未二十以鄉試魁陝西河東不幸早逝張吉甫
弔之云惜哉器之真丈夫少年讀徧天下書一
事不成死於途苗而不秀有矣夫秀而不實有
矣夫其為名流所嗟惜如此

遊棲巖寺

林表招人白塔明竹間蘭芷石泉清惠崇水墨西軒景
烟帶平蕪水帶城

毛宮教麾 七首

麾字牧達平陽人大定十六年舉學行特賜進士出身授校書郎入教宮掖歷太常博士終於同知沁州軍州事有平水集行於世

無題

小顰對起石州山楊柳分青入髻鬟乍識春風眼如鵲
為誰無語獨凭闌

遊河西孫氏園

亭榭依山水亂鳴已如輦畫障中行照溪芳樹紅雲合
迎客幽禽翠羽輕豪氣未饒金谷友醉魂如到錦官城
猶慚歸騎怱怱去不得持杯待月明

魏城馬南瑞以異香見貽且索詩為賦二首

梅心蘭甲類元同氣壓荀家百和功藉潤更煩纖手玉
出雲初試博山銅崇朝日下亭亭葢三月花間細細風
我有因緣在香火鼻端消息為君通

二卉真香豈復加便宜編譜入雄誇留殘一點薔薇水

幻出諸天薝蔔花佩帶正垂金鈿小薰爐孤起翠雲斜
金籠甲帳豪華事慚愧桑樞甕牖家

新春雪興韓府推

春到千門氣自嘉更教飛雪助年華六街官柳枝枝絮
一夜江梅樹樹花況是縱吟多伴侶直須爛醉作生涯
埽庭迎客東風裏幕府風流有故家

和思達兄杏花

碎剪明霞役化工曉園香散暖烟中羞逢柳眼三眠白

分得桃腮一笑紅上苑繁華迷故國曲江顚顚老春風
欲傳此恨花無語強對芳時作醉翁

春賞

潤入梅天雨乍晴喚回春意有新鶯雲霞照眼青山近
羅綺吹香白晝明翠勺銀罌沽酒市暖風遲日賣花聲
人人共喜華胥世何用遨頭羨錦城

朱宮教瀾

三首

瀾字巨觀霖堂先生之子學問該洽能世其家

大定二十八年進士時年已六十意氣不少衰
歷諸王文學應奉翰林文字終於待制党趙推
挽之力為多以嘗入教宮掖故集中多宮詞

寒食不出

地偏無客過吾廬寒食清明入燕居驥子捧甌仍臘茗
孟光舉案只春蔬蠅沾香篆渾傷字蜂戲瓶花半墮書
習氣未除還自笑却將佳節付三餘

黃筌雀蝶

飢雀喧爭蛺蝶孤錦官城闕見丘墟老筌妙意誰知解
丹粉圖中有諫書

宮詞

太液芙蓉上下天秋波澹澹白生烟採蓮宮女分花了
笑把蘭篙學刺船



御訂金詩增補中州集卷三十一

欽定四庫全書

集部

御訂全金詩增補中州集卷三十三

詳校官中書

臣張虎拜

主事銜

日徐以坤覆勘

總校官編修

臣王燕緒

校對官編修

臣勵守謙

謄錄監生

臣黃嘉績

欽定四庫全書

御訂全金詩增補中州集卷三十二

姑汾漫士王琢

六首

琢字器之平陽人與毛牧達同時相友善天性
孝友為鄉里所稱酷嗜讀書往往手自鈔寫家
素貧乏而能以剛介自持未嘗有所丐貸時命
不偶年四十五以病卒士論惜之有姑汾漫士
集行於世所著中聖人賦今世少有能到者詩

好押強韻務以馳騁為工七月十五夜看月云
歷樹有驚鵲悄鄰無吠犬對雨云春雨薄如夢
曉雲閒似愁秋霖云窓寒知氣重人靜覺泥深
驟雨云電點散冰彈電光飛火繩春陰云庭澹
梨花月樓寒燕子風久雨云練挂遮簷直麻懸
到地齊此類甚多

附元好問十七史蒙求序安平李瀚撰蒙求二
千餘言李華作序李良薦於朝蓋在當時已甚

重之迄今數百年之間孩幼入學人挾此冊少
長則遂講授之宋王逢原復有十七史蒙求與
李瀚並傳及詩家以次韻相夸尚以蒙求韻語
也故姑汾王琢又有次韻蒙求出焉評者謂次
韻是近世人之弊以志之所之而求合他人律
度遷就傳會何所不有唯施之賦物詠史舉古
人徵事之例遷就傳會或當聽其然是則韻語
次韻為有據矣

元夜雪

寶燈樓閣澹連雲轉盼俄驚糝玉塵遊伎行歌俱失意
蔬畦麥壠自知春良宵不肯平平過造物應誇着着新
獨有中天端正月一樽梅影屬閒人

和張仲宗雪詩不用體物諸字

天心應卜歲出此當佳占舞巧穿幽隙堆寒壓短檐閒
門誰擁篲醉館自開簾比興非無物詩人正避嫌

同漕使趙中憲對雪

投隙穿窗苦見侵，向無湘酎若為禁。
花多不入貧家眼，歲好方知造化心。
躍馬共思追兔跡，抱戈誰與置羊斟。
新詩與雪爭奇峭，擁褐空齋得細吟。

又一詩南華夢好
初飛蝶聞苑春閒

又落花似勝前詩恨
終篇不能完好耳

癸酉歲大熱

似動不動雲蒸空，欲雨未雨天無風。
時時日脚蹴雲破，一射萬土紅爐中。
纖絺挂體劇重鎧，大屋僅可為樊籠。
積冰為丘坐自漬，輕箴況得微涼通。
山林亦聞有暍死，

城市偏側宜無容吾生於熱亦屢度此熱盡可并前鎔
雖然一氣播常令頓作駭異疑非公曾聞天南有祝融
出入毒霧騎雙龍自從鼎去昧神怪無乃煽處行心胸
手搖斗柄酌炎海力逐燥怒乘離宮喜為鬱蒸怒為火
流燂金石乾河洪熾昌自欲弄朱夏驕蹇未肯官炎農
霞烟灼灼燥昏曉鳥獸喘喘茫西東此而不制滿三伏
遂恐百物隨枯蓬太白之兵攢萬峰銀河之浪滔無窮
可洗虐焰夷姦凶我欲呼愬煩神功眈眈九虎天關重

辛未九月二十一日雪

幾日西郊霧連宵北牖風菊花猶汎酒雪片忽填空草
樹秋容失河關曉氣濛聽初疑落葉仰不辨高鴻爛漫
三冬意憑陵百圃功披裘赴雞黍徑惜籬叢豈料玄
英巧來爭白帝雄剪裁渾草草飛舞太怱怱祗作干時
令非關兆歲豐冬雷怪相似春電冷應同安得蛟龍蟄
何由翳靄通日華姓赤壁天色湛青銅尚有登臨興寧
無賦詠工烟霞狂坐嘯一發醉顏紅

雨夕感寓

漠漠初燈後森森細點飄繁聲入遙夜冷簟恍秋宵起
欲吟相和吁無客可招何曾洗兵馬但覺漏薪蕘雷電
初無預炎蒸遂不驕瀉檐鏘未歇欹枕兀無聊澗已山
輸潦堤應水沒橋長林倦今夕孤鳥撼驚條似我纏憂
戚因貧墮寂寥避人猶虺蜴擇宿等鷓鴣共世難曹禰
無才匹管蕭苦心還自笑末俗本多囂未老愁摧鬢長
饑帶臃腰牀寒少陵被飲陋子淵瓢射策初游漢潛山

敢傲堯鹽車竟垂耳風鷁忌干霄一室元空埽千鍾豈
易要芳蘭逼憔悴斥鷃失逍遙字對諸生識詩煩衆手
琬搜求勞腎胃屢擊謝咸韶舊弄新絃掩窮途拙目搖
爭為壯夫篆只使古風澆血指甘時巧包羞愴道消優
游能卒歲三四儘論朝故幔幽霖透長檠暗燼挑不辭
牆出茵儻見穀抽苗饜飫貪夫腹翻騰樂歲謠晴樓交
燕雀涼樹沸蟬蛭坐快虹蜺出憂無萍梗漂浩歌彌激
烈興在海門潮

呂中孚 九首

中孚字信臣冀州南宮人孝友純至迄今為鄉人所稱累舉不第以詩文自娛有清漳集行於世其賦紅葉云張園多古木蕭寺半斜陽先君子甚愛之

小景

青蕪平野四圍山山郭依依紫翠間村遠路長人去少
一竿斜日酒旗閒

春月

柳塘漠漠暗啼鴉
一鏡晴飛玉有華
好是夜闌人不寐
半庭寒影在梨花

水聲

長陂千頃碧淙淙
浪卷秋風過石砮
記得夜來愁聽處
一燈明滅照寒窓

雪

隨風拂拂玉花飄
入夜寒窓更寂寥
爐火已殘燈未燼

一簾疎竹白蕭蕭

送李嘉甫信都令耘甫之弟

溪水碧於草溪邊送客行
寫詩傳別意把酒聽歌聲
去路青天遠歸心白羽輕
樽前折楊柳一一是離情

寫懷

秦川西去遠不意過漳川
歸夢三千里羈愁二十年
謀生空白髮行路若青天
餘事休相問淹留只醉眠

梨花

等待清明得得芳園枝晴雪暖生香洗粧自有風流態
却笑紅深睡海棠

集句

騷人吟罷起鄉愁百感中來不自由一種人間太平日
滿衣塵土避公侯

柳

風外綠絲裊綠烟輕花初破不成綿却嫌官路逢寒食
惱亂離愁似去年

王元節 三首

元節字子元弘州人祖山甫遼戶部侍郎父誨
海陵朝左司員外郎子元壻於南山翁傳其賦
學第進士雅尚氣節不能從俗俯仰故仕不達
既罷密州觀察判官即閒居鄉里以詩酒自娛
號遯齋老人年五十餘卒弟元德亦第進士有
能名於時終於南京路提刑使

青塚

環珮魂歸青塚月琵琶聲斷黑山秋漢家多少征西將
泉下相逢也合羞

與党世傑軍判丁亭會飲

望斷西州萬里家又將新火試新茶青油幕下成何事
兩見常山山杏花

古鎮道中

秀拔諸峰鎮海墩海水氣兩昏昏鷗飛翠竹白沙地
人宿黃魚紫蟹村向背雲山行處路淺深潮浦漲來痕

同游幸有能詩客不倦躋攀到石門

李端甫 一首

端甫字濟夫同州人第進士

中王內恕及人榜

仕為平

定州軍事判官工於詩有虎迹未乾溪水近樵
聲相答嶺雲深之句子實字師白死於壬辰之
亂

太白扇頭

巖冰澗雪謫仙才碧海騎鯨望不回今日霜紈見遺像

飄然疑自月中來

楊澤州庭秀

二首

補一首

庭秀字德懋華州人大定中進士學詩於蘭泉
張吉甫有渴心曉夢江湖濶醉眼春風草木低
之句泰和三年刺澤州致仕後閒居鄉里坐為
楊珪誣誤被法士論冤惜之

成皋道中

瘦馬成皋道阻長崢嶸冰雪老年光九關欲上虎豹怒

三逕未歸松菊荒
嵩少雲烟聊駐馬
漢唐宮殿兩亡羊
鄭南嶺下梅花發
千里相思空斷腸

李簡之蓮池集句

一月衰顏幾笑開
生前相遇且銜杯
蓮塘十里花如錦
有底忙時不肯來

松嶺謁衛公祠

深居太行巔繞郭山如帶
西南古松嶺傑出羣峰外
巉巖聳熊耳隱隱負鼇背
小樓不垂簾倚欄日相對
春風

遇休沐俗累謝機械寸心渴登臨老氣鼓衰憊陰崖冰
磴滑凌澗鳥道隘瘦藤盤絕頂清境豁眼界衛公廟貌
存英氣凜如在法輪靈迹古殿閣啓綵繪祖燈相繼續
劫火不可壞盤亭接天壇胸次何芥蒂蒼流會清泚緣
絡分枝派翠巒臥浮雲幽壑產珍怪松風噓笙磬巖溜
響環珮此來真勝遊所適了無礙不作白頭吟且償行
脚債可喚千金兒漫寫垂堂戒

孫省元鎮

一首

鎮字安常絳州人高才博學嘗中省試魁承安
二年五赴廷試賜第以陝令致仕年八十四卒
有注東坡樂府歷代登科記行於世弟寧州刺
史錡字安世潘原令鉉字安道同榜擢第鄉人
榮之號三桂孫氏安常孫說思美軍府叅佐安
世孫處謙志全安道孫蔚今俱在

許氏雙桂堂

許家二桂聯翩秀孫氏三枝次第春盛事若將相比竝

輸君堂上拜雙親

張著

二首 補一首

著字仲揚永安人泰和五年以詩名召見應制
稱旨特恩授監御府詩畫

九日

雨沐天容霽欲流好山誇翠出墻頭黃花憔悴東籬晚
一段陶家冷淡秋

雨後

西風無意卷纖雲
埽盡千峰雨脚痕
一片秋光清似水
家家空翠滿柴門

紫泉亭

西風禾黍亂蒼黃
滿眼秋山冷翠長
一片白雲攜雨去
人家籬落半斜陽

景覃一首

覃字伯仁華陰人年十八有賦聲
大定初三赴廉試後以病不就
舉博極羣書有舉問者立誦

數百言不休又從而講說之為人誠實樂易不
修威儀隱居西陽里以種樹為業落托嗜酒醉
則浩歌日以為常作詩有功樂府亦可傳予同
年進士王元禮嘗從之學說伯仁老不廢書有
勸以養目力者曰吾輩非讀書則無所用心要
當死而後已耳晚年於易有所得年七十終於
家自號渭濱野叟有集傳闕中

感事

蘭芳切禁當門種李苦何傷竝道生自古英雄足猜忌
莫教身外有浮名

段繼昌

五首

繼昌字子新白水人自號適安居士喜作詩與
華陰景伯仁相友善家甚貧而世間事皆不以
挂口有以錢遺之者必盡送酒家名酒曰黃嬌
蓋關中人謂兒女為阿嬌子新以酒比之故云
一日天苦寒人有遺之酒者飲不盡而醉夜半

忽驚起以衣衾覆酒缸僵臥榻上人為言酒自
不冰先生將不為寒所病乎子新笑曰人病尚
可酒病不可療也其好飲如此臨終辭鄉里託
以他適明日臥於党氏園亭大石上視之已逝
矣伯仁弔之云適安居士舊知聞廓達靈根厭
世紛辭罷親朋便歸去一籌今日又輸君

梨花

一林輕素媚春光透骨濃熏百和香消得太真吹玉笛

小庭人散月如霜

一溪

一溪流走青蛇春在江邊漁父家竹外寒梅看欲盡
清香移入小桃花

春早二首

魚兒水汎鴨頭綠野馬塵飛羊角風西崦山家籬落背
杏梢初見一分紅

斷冰銷盡荻芽尖凍壠蘇來白薺添幾片野雲飛不去

晚風吹作雨纖纖

讀紀信傳

鹿走中原兩虎爭
滎陽圍解事堪驚
當時拔劍論功者
矢口何人說紀生

附蒲城志金進士六人繼昌其一曾任御史

岳行甫
二首

行甫字仁老鄜州洛川人在關中最有詩名泰
和初有以仁老時病詩達之道陵者道陵大加

賞異授以官不就士論高之舊所傳沾泥柳絮
燕銜去鎖月梨花鶯喚開本前人詩又苦無佳
致世俗識真者少悞謂仁老所作乃閨傳之曾
見仁老詩百餘篇佳句甚多續當就秦中好事
家搜訪之

謝人惠二小漆冠

規製新翻出杜郎最宜閨子夜燒香不爭寶髻我宮樣
自與霓裳配道裝細攏翠鬟雲易滿淺銜牙櫛月難藏

水衡雙寄非無意要買楊枝惱孟光

立春日

銀線青絲翠椀堆爭牛擊鼓欲驚雷
翻風闌巧春頭勝
灑雪浮香臘尾盃迎暖梢梢金著柳
逗寒葉葉粉飄梅
不成一事人空老半百光陰又七迴

迂齋周馳

二首

馳字仲才濟南人經學出於醇德先生王廣道
賦學出於泰山李時亨至於党趙又其忘年友

也資性古雅而以襟量見稱大定中住太學屢
以策論魁天下私試亦頻中監元家素饒財鄉
人強以子弟從之學所得束脩皆散諸生之貧
者貞祐之兵濟南陷不肯降攜二孫赴井死鄉
人葬之宅後之壽樂堂遼東人吳子英嘗從仲
才學能記其所著亞父撞玉斗賦及他文數篇
著詩

章廟御題
限紅字韻

矢束形何短籌分色盡紅駢頭斯効力失偶竟何功比

數盤盂側經營指掌中
蒸豚挑項鬻湯餅拌油蔥
正使遭饒口何嘗廢直躬
上前如許借猶足沃淵衷

黻子

私盂反
鼓起也

勿以微才棄安危任不輕
誰憐一片小能使四方平
几案由吾正盤盂免爾傾
何當遇夷坦沈默更無營

此詩
王仲

澤所傳或以為仲澤作也以其與周
仲才詩意相近姑附於此以俟更攷

劉太常鐸

七首

鐸字文仲冀州棗強人承安五年進士元光二

年入為太常博士正大初改兵部員外郎以武昌軍節度副使致仕癸巳歲病歿於京師自號柳溪先生有集傳於家武成王著作序言文仲生未能言已識百餘字及授學穎悟過人為人生誠實少許可不徇流俗不慕榮利益實錄云子敏中字庭幹亦學詩今居洛中

三陽述懷

蟻穴吾猶夢蝸廬此僅容一川青靄合半嶺白雲封地

僻宜藏拙官閒足養慵只慙無補報潦倒不歸農

即事

亦在三
陽時作

地與中州迴民餘上古淳峽長深東渭路險曲通秦烟
柳千家曉風花百里春一官如自擇閒處著閒身

渾池驛舍用范極之郎中韻

慣從鞍馬作生涯宿處依依認是家爐火相看衣袖暖
盤飧未辦驛厨諱淹留歲月頭如雪汨沒風塵眼更花
永夜如何得消遣新詩吟罷自煎茶

春日

翠微深處幾人家風颺輕烟雨壓沙寒勒野桃開較晚
向陽纔有兩三花

所見

綸竿老子綠蓑衣細雨斜風一釣磯正是鄰家社醅熟
柳條穿得錦鱗歸

讀李訓鄭注傳二首

誰教閣宦作權臣肅代優游到敬文三子謀疎誰不道

洩機也合罪劉蕡

基醫入侍本防猜偶失機權亦可哀陳實至今佳傳在
莫從成敗論人材

御訂全金詩增補中州集卷三十二

欽定四庫全書

御訂全金詩增補中州集卷三十三

李扶風節

二首

節字正臣涇州人呂造榜進士以詩名關中資
性滑稽談笑有味而臨事以幹局稱歷威戎扶
風令初名守節哀宗即位去守字哀宗知其名
謂侍臣言吾不欲人避上一字李守節何故避
之良久曰臣子敬君避之亦可正臣有詩云梧

頭打出和糴米丁口簽來自願軍讀之則時政可知矣

漁父

舉世從誰話獨醒短蓑輕箬寄餘生
半篙春水世塵遠一笛晚風山雨晴
稚乳滿船生事簡魚鰕到市利源輕
旁人莫怪機心少曾與滄洲白鳥盟

有感

亂離何事最堪傷孝子陵前段氏莊
鑄鐵作門貽鬼笑

堆金齊斗買天亡春風草滿藏書壁落日狐鳴打麥場
惆悵賢郎一丘土過車腹痛獨難忘

劉勲

一十三首

補一首

勲字少宣本出洛陽元魏遷洛陽二十萬家實
雲中故其父祖而上為雲中人至少宣客居濟
南樂其風土遂占籍焉少日任太學與兄譙庭
老俱有聲場屋間南渡後專於詩學往往為人
所傳其先世本衣冠家風流蘊藉都無科舉氣

見於文字者亦然嘗有詩云萬里風沙憐病客
幾年刁斗厭寒更人憐直道違時好自喜閒身
與世輕擊筑漫流燕客淚佩蘭誰識楚臣心濟
南云午風襟袖知秋早甲夜闌干得月多又云
船行着色屏風裏人在迴文錦字中百和薰香
風過處萬盤珠落雨來時此類甚多少宣長於
尺牘落筆皆有可觀其樂府如暮鴉庭院春陰
淡之句尤可喜也

補歸潛志劉勲少宣雲中人初名訥字辯老與
其兄漢老俱工詩幼隨官居濟南二十餘載後
南渡居陳數與余先子唱酬為人俊爽滑稽每
樽俎間一談一笑可喜科舉連蹇竟不第年五
十餘陷陣死平生詩甚多大槩尖新長於對屬
其上先人云南山有後傳能賦北闕無人繼敢
言送余赴試云文章四海名父子孝友一門佳
弟兄又贈王清卿云長拖酒債杜工部新有詩

聲侯校書贈馬元章云曾著麻鞋見天子敢將
道服襯朝衣又畫馬末云神物世間尋不見五
陵春色草萋萋仲兄黹字庭老亦好古作詩不
凡

讀張仲揚詩因題其上

布衣一日見明君俄有詩名四海聞
楓落吳江真好句
不須多示鄭參軍

偶作

將軍馬躍五搥鼓客子車行三唱雞
白髮書生無伎倆
滿窓紅日醉如泥

杜善甫乞炭

筆口酸嘶解說窮寒爐隨手變春紅
因君大笑涪翁拙
費盡奇香得馬通

呈呂陳州唐卿

警盜何煩鼓夜搥麗譙清晝卷高牙
春回和氣一千里
雪與豐年十萬家
逋賦稍寬新得帖
軍書不至早休衙

新年載酒須行樂次第東風遶郡花

秋涼

桃笙乘勢獻微涼
紈扇無功送暑光
老病不嫌風露冷
莫教添作鬢邊霜

愛詩李道人嵩陽歸隱圖

脫却儒冠已自閒
更令家事勿相關
百錢便挂青藜杖
不看先生紙上山

元夜陰晦

逐逐雕鞍趁畫輪年芳樂事一番新芙蓉城暖東風夜
楊柳樓深笑語春兩鬢愁添新白雪十年夢到軟紅塵
空庭不見梅花月寂寞春陰最惱人

傷曹吉甫之死

官職雖低首不低爭教有志竟空齋向人指畫將何語
臥壁糊塗不解題小女遠牀猶戲劇老兵伏地亦悲啼
春風繫馬庭前樹只想東齋醉似泥

同趙宜之賦梨花月

雪樹生香淡月邊相媒相合關清妍空庭冷落鞦韆影
虛度良宵亦可憐

不寐

酪奴作祟攪秋眠追咎前非四十年一夜蟲聲相計會
併催白髮到愁邊

戲鄭秀才

張老豆新頻見餉鄭家米鑿不須賒客來粥熟吾能辦
要與齊奴關咄嗟

春日

粉蝶耽香夢正迷黃蜂和蜜計何癡
小軒無事誰如我臥看楊花點硯池

答仲和

此身安處苦難尋常羨歸鴉易滿林
望遠真成廣武歎得書空作洛生
吟逢人放適村村酒感物悲哀歲歲心
想得濟南花正好抱城春水一篙深

絕句

車轂春雷震屋山馬蹄亂電響柴關何時得箇茅庵子
不在車塵馬足間

李澥

四首

澥字公渡相人少從王內翰子端學詩能行書
工畫山水就所長論之詩為長性寬緩笑談有
味居京師十五年日游貴人之門所至以上客
延之善處世不為人所忌嫉雅有前輩典刑累
舉不第年六十餘卒於通許陳留之間

補歸潛志李澥公渡相州人王黃華門生也自
號六峰居士工詩及字畫皆得法連蹇科場竟
不第至六十餘病終時人言公渡賦不如詩詩
不如字字不如畫興定末與余同試開封中選
公渡甚喜有詩呈余先子後云姓名偶脫孫山
外文字幸為坡老知誰念三生李方叔欲將殘
喘寄鑪錘先子和答云瓶有儲糧鬻有絲蹉跎
歲晚坐書癡輞川畫隱王摩詰錦里詩窮杜拾

遺應舉尚陪新進士主文多是舊相知春闈看
決魚龍陣未必尖錐勝鈍錘士林相傳以為笑
談

漫書

胸懷平日窓八達伎倆只今龜六藏唯有閒情如老菊
寒花自信晚來香

二老雪行圖

雪明萬仞鄴西山杖屨平生幾往還滿眼京塵空對畫

何時真似兩翁閒

祕書張監墨梅圖

張南人

眼中只有梅千樹不挂世間蜂蝶花十載江南春夢斷
至今清影在君家

燈下梅影

丁年夜坐眼如魚老矣而今不讀書牆角短檠還有用
瓦瓶相對一枝疎

秦畧

一十三首

畧字簡夫陵川人父事軻有詩名工作大字簡
夫少舉進士不中即以詩為業詩尚雕刻而不
欲見斧鑿痕故頗有自得之趣悼亡一首高出
時輩殆荆公所謂看似尋常最奇崛成如容易
却艱難者耶年六十七卒臨終留詩云軀殼羈
棲宅兒孫邂逅恩雲山最佳處隨意著詩魂簡
夫自號西溪老人有集行於世子彥容為黃冠
師今在平陽

拳秀峰

平滑石之俗其俗資磨礱磊醜石之秀其秀在醜中正
如古丈夫貌寢氣質雄又如聖人心孔竅虛明通大都
一拳許含蓄華與嵩大巧本如拙足見造化功好處元
更多摹寫不易工君其善調護抵擊防兒童

雪行

匹馬東來冰雪天蒼山手冷墮吟鞭烟中髣髴聞雞犬
不覺人家到眼前

鳥影過寒塘

著眼分明莫作疑從來形影本同歸不應水底青天上
更有飛禽仰面飛

悼亡

自古生離足感傷爭教死別便相忘荒陂何處墳三尺
老眼他鄉淚數行多事春風吹夢散無情寒月照更長
還家恰是新寒食忍見堂空紙挂牆

元日

新厯從頭數殘冬與我違不知垂老至但覺拜人稀
汲水泥融井看書暖入幃多情牆外柳新綠已依依

贈趙宜之

年時見君行路難喜於長安新得官日來見君鄰婦哭
驚似藍田尋得玉愛官愛玉樂有涯愛君之詩無盡期
古人骨冷不復作主張騷雅非君誰

白髮

臨水時自照照我鬚與眉鬚眉何所似恰似純白絲從

茲一白後寧有再黑時譬如花落地不復還故枝殷勤
語鬚眉聽我自解詩幼小癡讀書既壯多憂思自苦有
冰蘖自潤無膏脂勞生到今日汝白將何辭

同希顏裕之賦樂真竹拂子

覓箇龜毛抵死難直教擊碎釣魚竿世人不用生分別
信手拈來總一般

少室山卓劍峰

神威洗盡世間讐電歇雷閒怒氣收一柄太阿留少室

却擎空掌華山頭

此身

此身日日一簞貧
貧裏留殘自在身
獨把筇枝行又立
東風花柳不嗔人

穀靡靡上黨公府作

穀靡靡青割將來強
半批急忙舂米送官倉
只恐秋風馬塵起
官倉遠在蕎麥山南梯
直上青雲間
梯危一上八九里之字
百折縈迴環
憑誰說向監倉使
斛面莫教

高一指請君沿路看擔夫汗顆多於所擔米

麝香

山麝逃風遠谷藏一山行過四山香
臍堂自養千鈞弩枉怨虞人鼻孔長

趙洛道中

柔青初散隴頭桑村落人家布穀忙
一段蕪菁渾著角葉間猶有幾花黃

張琚 二首

琚字子玉河中人父鉉字鼎臣大定中第進士
仕至同知定國節度使事子玉刻意於詩五言
其所長也如初至華夏云老雨梧桐夜孤燈蟋
蟀秋客同州云秋風留客館夜雨藉僧氍毹詩人
喜稱道之至有張五字之目集號韋齋

移河中

耕戰連年廢吾知有此行條山猶在眼渭水若為情飽
肉豺狼喜傾巢燕雀驚西樓今夜月愁絕是空城

秋夜

人與年華老愁兼節物雙高風梧墮砌久雨竹侵窓客
簾悲秋臥僧鐘數夜撞更堪衰鬢影蕭颯照寒缸

馬編修天來

一首

天來字雲章人止謂之元章介休人黃裳榜經
義進士博學多技能畫入神品百年以來無出
其右者屏山常言天下辯士有三王仲澤馬元
章純甫其一也元章住太學十九年貧苦之極

人所不能堪然其談笑自若也大安初調潁州
司候靈壁簿召為國史院編修官正大九年病
歿於京師年六十一劉紹宣有贈詩云波瀾口
頰談玄駛土木形骸與世違疇昔麻鞋見天子
只今道服勝朝衣蓋實錄也元章多作詩欲別
出盧仝馬異之外又多用俳體作譏刺語如云
木偶衣冠休嚇我瓦伶口頰欲謾誰嚙骨取肥
屠肆狗哺糟得醉酒家猪如此之類不得不謂

之乏中和之氣至其賦丹霞下寺竹云人天解
種不秋草欲界獨為無色花雪云夜來窓外渾
疑月今日牆頭不見山末云先生睡起騎驢看
太素一游非世間龍門云白含雲竇雪青補石
門天則知詩者亦當以功掩過耳

補歸潛志馬天來元章太原人擢第與雷希顏
宋飛卿同年為人詭怪好異又喜為驚世駭俗
之行人莫測焉南渡為史院編修官不事修飾

麻條草履沈浮間里殊無朝士風
雜學通太玄
數又善繪畫及塑像雖居官輒為人塑畫入神
頗善李屏山當屏山歿為寫真且題以贊皆怪
語末曰若到黃泉見魯仲連蘭相如道余傳示
其狂誕如此後以病終

山中

青林寂寂鳥關關
畫出風烟落照間
脫却草鞋臨水坐
野雲分我一邊閒

附畫史會要馬天來能畫作小竹石瀟灑可喜
又雲漢雲卿天來弟皆善畫

張內翰本

一十首

本字敏之觀津人貞祐二年進士工於大篆及
八分四十歲後學詩詩殊有古意正大九年以
翰林學士從曹王出質客居燕京長春宮將十
年後游濟南病卒

得王子正書

晨鵲何處來飛鳴向前除故人在天涯遺我尺素書為
言長相思夢寐同所居所居亦靡他上論揖讓初覺來
獨愴然淡月留太虛蹇予臨末路世味皆泊如一學未
敢輟尚念客氣鉏切磋與琢磨正恐朋友疎自從吾子
東門乏長者車發揮天人奧大辯孰起予丹陽何高明
吾子昔所廬南軒拂翠筠北潭照紅葉蝗害非不虐子
食豈無餘灤江固自佳何堪曳長裾春風旦夕至歸哉
莫踟躕

寄弟

離離丘壠田鬱鬱霜露思相隔二十年旦暮一何悲中
途涉萬里天幸復來歸宴安此懷居愧彼神與祇叔兮
孝且友見義能不疑上念先塋孤亦憫乃兄癡護喪營
大葬勤苦我所知昨朝尺書來殷勤咸及茲燈下展轉
讀涕淚沾裳衣父祔失臨穴子焉庸我為我非羽毛寄
飽食冥然飛田居有素懷行當事畬菑與子奉遺祀沒
身以為期

梁都運斗南新居落成

購材燕市中作室何翹翹老手為拮据百日不敢驕室
成僅容膝勃谿益無聊云胡寫予懷惟是風雨宵先生
名大夫黼衣華四朝楓堂接桂室燕處俱逍遙新築誠
瑣兮貧飲稱一瓢居之不自陋無乃壯志消孰知君子
心一念恒萬朝滔滔寧我盈凜凜不我凋處樂及處約
所以長囂囂里社來落成賤子亦見招盤餐無兼味至
樂等聞韶我獨何人斯永惟德音昭日居及月諸維此

心搖搖

中秋雨夕呈君美

怪得秋雲不肯晴，天公為惜此杯傾。
無邊清景關人意，多事西風送雨聲。
桂樹婆娑辜勝賞，桐枝點滴厭殘更。
殷勤朝鏡休重攬，白髮星星又幾莖。

九日月中對菊同禧伯郎中賦六首

花上清光花下陰，素娥惜此萬黃金。
一杯寒露三更後，誰信幽人更苦心。

九日餘香伴月明一觴亦足暢幽情
青樓夜半琵琶語不說人間有此清

子山牢落去江南賦主悲哀尚一堪
只恐秋天聞亦苦

併催紅雨下霜巖

庾信哀江南賦
唯以悲哀為主

病魂招得未渾全
瞑倚秋屏豈是禪
一夢忽成霜蝶去
草深三逕若為眠

牢落斯文念賈生
精神瑯玕坐寒更
一書草就渾衣臥
恨殺東方不肯明

龍山戲馬賞秋光多少新詩入錦囊磨滅英雄豈勝數
千年依舊一花香

附甘水仙源錄訥菴張先生諱本字敏之觀津
人幼年與真常李真人為同舍生初真常之入
道也先生以嗣續歸之既知牢不可奪乃各言
所志而訣貞祐二年先生中詞賦高第平生工
於大篆及八分作詩殊有古意正大九年以翰
林學士使北見留遂隱於黃冠居燕京長春宮

申編修萬全

二首

萬全字百勝高平人兄無夷字百福崇慶二年
進士百勝少大聲太學中貞祐二年乙科調福
昌簿不赴隱居盧氏山中以讀書為業作詩有
靜功然不多見也正大中召為史館編修從行
省慶山南征道中有詩云回首秋風謝敝廬崎
嶇又復逐戎車人生行止元無定一葦江湖縱
所如不數日溺水死人以為讖云

補歸潛志申編修萬全字百勝高平人與其兄
無夷百福俱擢第百勝為人沈重不妄交好經
學勤勤君子儒也嘗為鄭縣令愛民慎獄不為
赫譽邑民便之後召入史館俄攝監察御史應
奉翰林居京師朝歸閉門講誦不出覩時事不
愜意每欲以母老歸未果也正大末為南伐行
臺辟掌書檄至淮上大雨宵行溺水死士論惜
之趙閒閒為文以祭哀甚初百勝在太學與雷

丈希顏及余先君同舍相善先君嘗稱其為人
後入朝先君已下世余因得從為文亦典雅有

體

病中遣懷

浪走天涯歲月侵病中猶作越人吟野麋本自便豐草
倦鳥寧當忘故林畫像功名元有命乞墻富貴果何心
幾時真脫塵囂累巖穴尋居不厭深

和陳舜俞詩

開裏那容更出頭石田茅屋喚歸休杜門便與詩書老
過隙從教歲月流盤木見容良自媿錯刀相贈若為酬
酌君安得如川酒醉眼虬蟬萬戶侯

崔遵 三首

遵字懷祖北燕人父建昌字曼卿大定二十五
年進士仕至同知武安軍節度使事懷祖事繼
母孝與人交有終始遲重少語未嘗及人短長
少日在太學有賦聲南渡後不就舉選居崧山

二十年課僮僕治生生理亦粗給前輩如趙吏
部子文張左丞信甫馮亳州叔獻咸懷祖丈人
行皆與之詩酒相往來懷祖喜賓客有蘊藉從
容文雅使人久與之處而不厭也嘗有宿少林
詩云青山已有十年舊小雪又為三日留其他
往往稱是

送裕之官鄧下兼簡仲澤

青燈別酒夜沈沈力負相思自不任閒裏更誰留我醉

興來無復伴君吟一枝仙桂知難擬千頃黃陂未厭深
為向荊州王粲道安排佳境約相尋

和裕之二首

行李西來便得君相從回首七經春君方備恙原思病
我亦私憐仲父貧底事却成今日別枯腸難著此愁新
鳶肩火色真將驗馬虎何勞更問辛

不幸還能作幸民十年同醉潁川春酒船載我雖堪老
仕路有時或為貧少室山人三日惡夷門紙價一番新

益知哀樂中年事未唱驪歌鼻已辛

王主簿革一首

革字德新一名著臨潢人以蔭補官碌碌筦庫
餘三十年正大中以六赴廷試賜出身調宜君
簿為人有蘊藉善談笑密公與之唱酬相得甚
歡初在太原作詩有赤心遭白眼笑面得嗔拳
之句公甚愛之有詩寄之云柳塘雲觀千鍾酒
笑面嗔拳五字詩蓋志此也及第後呈同年云

孤身去國五千里一第遲人四十年大為閒閒
所稱德新交游滿天下獨許欽叔與予為莫逆
云年七十八終於雲中

寄答劉京叔

十年相望惜睽違驚見蘭章墮客扉鄭子已聞畊有谷
榮公誰念老無衣水浮落日流無盡山礙行雲斷不飛
千古神州亦吾土幾時同采北山薇

衛承慶

一首

承慶字昌叔襄城人父文仲承安中進士以孝
友淳直稱於鄉里官至文登今年七十餘卒臨
終沐浴易衣冠與家人訣怡然安坐誦東坡赤
壁樂府又歌人間如夢以下二句歌闌而逝昌
叔資沖澹有父風及識路宣叔王逸賓文伯起
故其詩似之

感興

十日不出門出門春已好並山花更多十里紅未了朝

看花尚妍暮看花又老
薦紅墮危枝餘香寄芳草
人生祇如此百年疾過鳥
安得脫塵寰遊戲萬物表



御訂全金詩增補中州集卷三十三